


LETTRES

PATENTES, PAR LESQUEL-

les le Roy declare que nul ne pourra
estre receu à reculer sa Cour des
grands Iours establie à Poictiers en
corps & general, ains seulement en
particulier suivant ses Ordonnan-
ces.





A POICTIERS,

Par ABRAHAM MOVNIN, Imprimeur
Ordinaire de la Cour des Grands Iours.

M. DC. XXXIIII.

Avec Privilege du Roy.





O VIS PAR LA
GRACE DE DIEV
ROY DE FRANCE
ET DE NAVARRE;
A tous ceux qui
ces presentes Let-
tres verront, Sa-
lut. Les Roys nos

predecesseurs d'heureuse memoire, par
vne louable coustume selon que le
temps & les occasions l'ont requis, ont
enuoyé en nostre Ville de Poictiers
certain nombre de President & Con-
seillers choisis du corps de nostre
Cour de Parlement de Paris, pour y
tenir la Cour vulgairement appelée
les Grands Iours, & y administrer la Ju-
stice selon le pouuoir & iurisdiction
qui leur sont attribuez par les Ordon-
nances & Commissions surce faictes,

A ij

suivant lequel bon exemple joint l'urgent
 necessité : Aurions de n'agueres
 enuoyé nostre ditte Cour des Grands
 Iours en nostre ditte Ville de Poictiers,
 composée de personages par nous
 Esleuz dudit corps de Parlement de Pa-
 ris des plus dignes entiers & idonies : A
 cet effet esperant qu'il en reüssira vn
 merueilleux fruiet bien & repos pour
 toute la Prouince , & seroit encore
 d'auantage si le cours de la iustice n'e-
 stoit interrompu ainsi qu'il est venu en
 nostre cognoissance par malice & sub-
 tilité d'aucuns , lesquels pour éuiter la
 iuste punition de leurs crimes & male-
 fices faire couler le temps & illuder la
 iustice , esperent où peuuent proposer
 des causes de recusations , tant à l'en-
 contre du corps general de laditte Cour
 des Grands Iours, que particulièrement
 contre les Iuges sans fondement ny
 vray semblance aucune comme il à esté
 pratiqué souuent à l'encontre des Iuges

inferieurs, & leur suffit quoy que soit de
prolonger le temps & abuser de la Iu-
stice, ce qui n'est tollerable comme cho-
se de tres-pernicieuse consequence &
exemple, car cōme nous desirons & est
nostre saincte intention que iustice
bonne & sincere soit administree à nos
subjets par bons & equitables Iuges nō
suspectz, passionnez ne fauorables, aussi
n'est il raisonnable de souffrir les subter-
fuges & malice qui se pratiquēt & exer-
cent par le moyen de friuolles & abu-
sives recusations nottoirement faulces
& inuentées au mespris de nous : A ces
causes & autres bonnes & grandes con-
siderations à ce nous mouuans ; Auons
par l'aduis & deliberation des Princes
& Seigneurs de nostre Conseil estans
lez nous dit & declaré & ordonné, di-
sons declarons & ordonnons par ces
presentes signées de nostre main que
soit en matiere Ciuille où Criminelle,
aucuns de nos subjets de quelque qua-

lité estat & condition qu'il soit ne sera,
 & ne voulons qu'il soit receu à recuser
 laditte Cour des Grands Iours en corps
 & en general. Et pour le regard des
 Presidents & Conseillers en particulier
 pourront estre recusez conformément
 à nos ordonnances , pourueu toutes-
 fois & non autrement qu'il demeure
 dudit corps en compagnie outre les re-
 cusez le nombre requis & suffisant pour
 iuger les causes de recusation dont sera
 question ensemble le procès principal,
 sans que nostre dicte Cour des grands
 Iours aye esgard ny s'arreste à ce qui se-
 roit proposé & allegué au contraire, ains
 passera outre suiuant nostre presente
 intention & ordonnance, validant &
 authorisant tout ce qui sera fait & or-
 donné conformément à icelle faicte par
 maniere de prouision & sans tirer à con-
 sequence: Si donnons en mandement à
 nos amez & feaux les gens tenans no-
 stre Cour de Parlement ausdits grands

112

Iours de Poictiers, que ces presentes ils entretiennent gardent & obseruent, fassent entretenir garder & obseruer inuiolablement lire publier enregistrer, cessant & faisant cesser tous troubles & empeschement, au contraire en tesmoing dequoy nous auons fait mettre nostre scel à ses dites presentes: **DONNE'** à Chantilly le dixneufiesme iour d'Aoust, l'an de grace mil six cens trente quatre, & de nostre regne le vingt-cinquiesme. Signé **LOVIS.** Et plus bas par le Roy, **DELOMENIE.** Et à costé est escrit.

L *Eues publiées & registrées, oüy & ce requerrant le Procureur General du Roy, pour estre executées selō leur forme & teneur. A Poictiers és grands Iours y seant le vnziesme Septembrre, mil six cens trente quatre. Signé, RADIGES.*

